

Pagkahimong usa ka tinun-an ni Jesukristo

MANWAL SA SEMINARY ALANG SA BAG-ONG TUGON

Pas-ana ang imong krus

Basaha ang Lucas 9:23, nga mangita sa mga gikinahanglan sa Manluluwas aron mahimong Iyang disipulo.

- Unsa ang gitudlo niini nga bersikulo mahitungod sa pagkatinuod nga disipulo ngadto ni Jesukristo?

Kini nga bersikulo naghisgot sa pisikal nga krus nga gipas-an ug giantos ni Jesukristo alang sa katumanan sa kabubut-on sa Iyang Amahan. Bisan kita wala gipapas-an sa usa ka pisikal nga krus sama sa gihi-mo sa Ginoo, kita gisultihan nga mosunod Kaniya pinaagi sa pagtuman sa kabubut-on sa Langitnong Amahan alang kanato bisan og kini malisod.

Basaha ang Hubad ni Joseph Smith, Mateo 16:26, ug tan-awa unsay ipasabut para nato nga magpas-an sa atong krus ug magsunod kang Jesukristo.

Si Elder Ulisses Soares sa Korum sa Napulog Duha ka Apostoles mipasabot unsay gipasabot sa pagpas-an sa atong krus.



Kita nakat-on pinaagi sa mga kasulatan nga kadtong kinsa gusto nga mopas-an sa ilang krus sa ilang kaugalingon nahigugma ni Jesukristo sa paagi nga sila magdumili sa ilang kaugalingon sa tanang dili diosnon ug sa tanang kalibotanong kahigal ug motuman sa Iyang mga sugo.

Ang atong determinasyon nga walay buhaton supak sa kabubut-on sa Dios ug sa pagsakripisyo sa tanan nga gisugo nga ihatag ug sa pag-sunod sa Iyang mga pagtulun-an makatabang nato sa paglahutay diha sa dalan sa ebanghelyo ni Jesukristo—bisan sa nasinati nga kalisdanan, kahuyang sa atong kalag, o sosyal nga pagpamugos ug kalibotanong mga pilosopiya nga supak sa Iyang mga pagtulun-an. (Ulisses Soares, “Magpas-an Sa Atong Krus,” *Liahona*, Nob. 2019, 113–14)

- Nganong kinahanglan man nimong hikawan ang imong kaugalingon sa bisan unsang pagkadili-diosnon o kalibutanong mga kahigal sa imong kinabuhi?
- Sa unsang mga paagi nga ang paghikaw sa imong kaugalingon sa pagkadili-diosnon o kalibutanong mga kahigal susama sa pagpas-an sa usa ka krus?
- Unsaon kaha nga ang “pagpas-an sa imong krus” mahimong makatabang kanimo aron mahimong usa ka tinuod nga disipulo ni Jesukristo?

Wagtanga ang inyong kinabuhi aron maluwas kini

Basaha ang Lucas 9:24–25, nga mangita kon unsay gitudlo sa Ginoo mahitungod sa pagkahimong Iyang disipulo.

- Unsa ang gitudlo niini nga mga bersikulo mahitungod sa pagkahimong usa ka tinuod nga tinun-an ni Jesukristo?
- Sa imong hunahuna sa unsang mga paagi nga ang mga tawo nga nagtutok sa kaugalingon nilang kabubut-on ug hinakog nga mga tinguha sa kaulahian “kawagtangan” sa ilang kinabuhi?
- Unsa sa imong hunahuna ang gipasabot nga imong maluwas ang imong kinabuhi kon imo kining wagtangon alang kang Jesukristo?

Si Presidente Thomas S Monson (1927–2018) mipasabot unsa ang gipasabot niini nga wagtangon ang atong kinabuhi alang kang Jesukristo.



Kadtong kinsa nagpakabuhi lamang alang sa ilang kaugalingon sa kataposan maminosan ang ilang pagkatawo ug sa mapasumbingayong paagi mawagtangan sa ilang kinabuhi, samtang kadtong nahikalimot sa ilang kinabuhi diha sa pagserbisyo sa uban motubo ug molambo—ug sa ingon moluwas sa ilang kinabuhi. (Thomas S. Monson, “Unsa may Akong Nabuhat alang sa Usa ka Tawo Karon?” *Liahona*, Nob. 2009, 85)

ANG SIMBAHAN NI
JESUKRISTO
SA MGA SANTOS
SA ULAHING MGA ADLAW

- Kinsa man ang imong nahibaloan nga mipili nga kawagtangan sa iyang kinabuhi tungod ug alang kang Jesukristo? Unsay epekto niini nga desisyon diha niini nga tawo?
- Sa unsang mga paagi ka napanalanginan tungod kay si Jesukristo mipuyo sa mga pagtulun-an niini nga mga bersikulo?

Buntoga ang mga makabalda ug mga pasangil

Basaha ang Lucas 9:57–62, nga mangita kon unsay gustong buhaton sa pipila ka mga indibidwal sa dili pa mosunod sa Manluluwas.

- Unsa ang gitudlo niini nga mga bersikulo mahitungod sa pagkahimong usa ka tinuod nga tinun-an ni Jesukristo?

Si Jesukristo wala nagpasabot nga sayop ang pagbangotan sa kamatayon sa usa ka minahal o ang pagpanamilit sa mga higala ug pamilya. Inay, Siya nagtudlo kanila og usa ka importanteng leksiyon mahitungod sa bili sa pagkadisipulo.

Si Presidente Howard W. Hunter (1907–1995) mipasabot sa analohiya sa pagdaro sa Lucas 9:62.



Aron mokalot og tul-id nga tudling sa umahan, ang magdaro kinahanglan nga mopunting kanunay sa iyang mga mata sa usa ka permanente nga paingnan sa unahan niya. Kana magpabilin kaniya nga maanaa sa husto nga dalan. Kon, hinoon, mahitabo nga molingi siya sa luyo sa pagtan-aw sa iyang giagian, ang iyang kalagmitan sa pagkasaag modako. Hiwi ang mahimong resulta ug dili pareho ang distansiya sa tudling sa umahan. . . Kon ang atong mga kusog wala nagtumong sa atong luyo apan sa unahan nato—sa kinabuhing dayon ug sa hingpit nga kalipay sa kaluwasan—kita siguradong makaangkon niini. (Howard W. Hunter, “Am I a ‘Living’ Member?” *Ensign*, Mayo 1987, 17)

- Unsa ang mga komon nga rason nga lagmit ang mga tawo karon mohatag sa pagpili nga dili mosunod sa Ginoo?
- Unsaon man nimo pagpabiling nakapokus sa unsa ang ipabuhat sa Manluluwas kanimo karon ug sa imong umaabot?